

MATENGA O MERE PATARIKI, M.B.E.

I TE 1 o nga ra o Hune, 1926, ka mate a Mere Patariki ki te Kawakawa, Pewhairangi. I mate whakarere, i mate i te mate e karangatia nei e te pakeha he "stroke." Ona tau e 69.

He wahine tenei i ngakaunuitia e te Maori e te pakeha, mo ana mahi rangatira, awhina hoki i te rawakore.

I te wa o te pakanga nui ka mahue ake nei, ko ia te kaiwhakahaere o nga mahi katoa mo nga hoia, o konei, ahakoa taha pakeha, ahakoa taha Maori. Hei tohu whakanui mo ana mahi pai, ka tukua mai e te Kingi ki a ia te tohu honore, ara te M.B.E. (Member British Empire).

I mua o te rironga ko nga pohimahita hei kai-rehita mo te mahi pooti, i a Mere Patariki taua tunga mo nga tau maha. Ko ia ano hoki te kai-whakamaori o Te Kawakawa.

Ko tenei wahine he mokopuna tuatahi na Hawea Te Mauparawa o Nuhaka. Ko te whaea ko Ngamoni, i moe i a Honetini, he pakeha no Ingarangi. Ko ona whanaunga i mahue iho ki tenei takiwa, ko Tuihana Honetini o Pancera (Parnell) Akarana, tuakana ki a ia, ko Hawea Patariki, roia o Te Kohukohu, he tamaiti nana, me tana kotiro Pororene Reweti.

Haere ra e kui ki a Ratou ma i Te Hono-i-wairua. Waiho iho ki o uri i te Aoturoa nei tou wairua marama, ngakau manaaki, tauira pai, hei taonga whakarere iho mau ki a ratou. Nou te ingoa pai, heke iho ana tou pai hei taonga honore ki runga i te iwi Maori nui tonu.

HE POHIRI NA MATATUA.

Te Whareotoroa, Whakatane.

Hune 16, 1926.

Ki nga Iwi, ki nga hapu, ki nga reo, ki nga huihuinga tangata, e noho maina i o koutou marae, tena koutou.

He powhiri atu tenei kia tae mai koutou ki Te Whareotoroa waahi o Whakatane i te 16 o nga ra o Hurae, 1926, kia kite i te hurahanga o te kohatu Whakamaharatanga ki a Te Hurinui Apanui. Ka hurahia taua kohatu i te 18 onga ra o Hurae, 1926, i te 11 onga haora i te ata. Haere mai, haere mai, mauria mai o tatau aitua ki konei mihia ai.

Na Emere Raiha Apanui.

Te Keepa Tawhio.

Matatua katoa.

Mo te mare kaore he rongoa hei rite ki te WOODS' GREAT PEPPERMINT CURE.